

# 3 YOANE

## Pepa Yoane ingere muli ndo panzi kalo-tawana tamâta

Yesu ne pâri tamâta Yoane ingere ngua pinde panzi kalo-tawana tamâta ngu (1-2 Yoane), aku zo pinde ilâ lâ, ñinenğa ingere ngua pinde kilo. Ingere ngua ñine ku io ilâ pa ninambwe tonje, i ña tu Gaius. Gaius nde tamâta ñalae lâ kalo-tawana tamâta ngu tonje, aku Yoane indekana i ñana kie ara iveta panzi kalo-tawana tamâta soka lombo simâ sipânga i ne lawea ñinde. Andeta Yoane iporo ngua kaika ilelea tamâta tonje imo kunzi ngu ñinde, i ña tu Diotrefes, ñana tu i ipu muli panzi tamâta lombo ku ipasuka tamwata tini.

<sup>1</sup>Naña amo kalo-tawana tamâta ngu nenzi katonâña. Naña angere ngua lâ pepa ñine tini imâ pa noko, Gaius. Noko nde naña ñingu-nambwe sondo, aku naña aporo mao nâ tu naña ilonğu ndo keno pa noko.

<sup>2</sup>Ñingu-nambwe, naña ilonğu tu vetâña rârâni noko uru kuveta ñinde ma ipânga sondo nâ. Aku naña ilonğu tu pukonja kie-kie rârâni ma ingenje ñanano tona. Naña asama tu noko ne ilo-kalo tava ne kalo-tawana nde ikeno ara nâ. <sup>3</sup>Munğa, ninda-nambwe pinde nde simâ ñana simora naña kâ, aku situla noko parina pa naña mine tu noko uru kupono muli pa ngua mao nâ. Kinzi siporo tu noko kupile vetâña mao ñinde tia ndo. Naña aloño ngua mine, aku wisinğu ara ndo. <sup>4</sup>Lâ zo ndia naña aloño ngua tu naña natunğu uru sipono muli pa ngua mao nâ, ande ñinde iveta ilonğu ara ndo, aku ndekâña ñinde ipole nanenğu ndekâña pinde rârâni.

### Gaius iveta wurâta ara

<sup>5</sup>Ñingu-nambwe, noko uru kupono muli pa vetâña ara, aku uru kuveta kie ara ndo ñana kuvilanzi kalo-tawana tamâta ñinde soka lombo simâ pano. Noko munğa kusamanzi tia, andeta kuveta kie ara nâ panzi.

<sup>6</sup>Tamâta ñinde sitapâri panzi maka nema ngu ñana noko ne tini-mwasa ñinde kâ. Aku lâ zo ndia tamâta lombo mine situ soka nzalanzi kilo silâ kâ, ande ara ñana noko ma kuvilanzi kilo ñana kekelele pinde ñana

nenzi yokâŋa kâ. Maro Kindeni ilo pa vetâŋa mine. <sup>7</sup>Muŋga, tamâta lombo ŋinde ilonzi tu siveta wurâta ŋana situla Yesu parina kâ, aku sipile warakanzi nenzi lawea ku silâ ŋana siveta mine kâ. Andeta kinzi sinonzi tinikoa pinde ŋana kelekele silanzi kâ, ande tia. <sup>8</sup>Mine nde ara ŋana kinda kalo-tawana tamâta ma tavilanzi tamâta ŋinde uru siveta wurâta pa Yesu. Ambo kinda ma taveta mine, ande kinda ma tapâŋga nenda wurâta taitu kunzi, ŋana tatula Maro Kindeni kawa ŋgua mao kâ.

#### **Diotrefes uru iveta vetâŋa sakamao**

<sup>9</sup>Naŋa muŋga aŋgere ŋgua pinde lâ pepa tini imâ panzi tamâta lâ noko ne ŋgu. Andeta Diotrefes itu i ma ipâŋga tamâta mbâna-mbâna panzi, aku ipu muli pa maka nema ŋgua ŋinde. <sup>10</sup>Mine kala ambo naŋa ma amâ amo kumi, ande naŋa ma aporo pwataki ŋana mâsi ŋinde i uru iveta. I uru iporo ŋgua nao-muli wa ŋgua soki-soki rârâ ŋana maka kâ. Andeta ŋinde nâ tia; i tini pwâka tu ikainzi kalo-tawana tamâta soka lombo ŋinde ku ionzi lâ i ne luma ilo. Aku lâ zo ndia tamâta pinde sikainzi lombo ŋinde ŋana sionzi lâ warakanzi nenzi luma ilo, ande i uru isilikananzi kaika, aku iŋaranzi piti lâ ŋgu ŋinde.

#### **Demitrius uru iveta vetâŋa ara**

<sup>11</sup>Niŋgu-nambwe, noko ma kupaveta kuku mâsi sakamao mine ndimo. Ara ŋana noko ma kupaveta kuku vetâŋa ara nâ. Tamâta ea kinzi uru sipaveta kuku vetâŋa ara, ande kinzi simo Maro Kindeni natu wukale. Aŋga tamâta ea kinzi uru sipaveta kuku vetâŋa sakamao, kinzi ŋinde sisama Maro Kindeni kilala, ande tia.

<sup>12</sup>Tamâta rârâni uru situ Demitrius parina tu i nde tamâta ara ndo. Aku i tamwata ne vetâŋa itula pwataki tu ŋgua ŋinde nde mao nâ. Aku maka kala katula ŋgua pwataki ŋana i ne vetâŋa ara ŋinde kâ, aku miki kasama tu maka uru kaporo ŋgua mao nâ.

#### **Katonâŋa ilo ndo tu ma imora Gaius**

<sup>13</sup>Naŋa iloŋgu tu aŋgere ŋgua rârâ imâ pano, andeta tiniŋgu pwâka tu ao ŋgua ŋinde lâ pepa tini. <sup>14</sup>Naŋa iloŋgu tu amâ amora noko walele nâ, aku lâ zo ŋinde kinda rua ma taporo wa tapaloŋo wa.

<sup>15</sup>Wisi-pisi imâ pano. Ninda-nambwe lâ maka nema ŋgu ŋine nde kawanzi kari ara pano. Aku ara ŋana noko kala ma kuporo wisi-ara ne ŋgua mine nâ ilâ panzi ninda-nambwe taitu-taitu simo lâ noko ne ŋgu ŋinde.